

四庫全書薈要

• 乾隆御覽本

史部

欽定四庫全書叢要

史部

魏書卷三十六
七

詳校官內閣侍讀臣孫球



欽定四庫全書薈要卷四千四百五十五

史部

魏書卷三十六

齊

魏

收

撰

東列傳第二十四

李順

李順字德正趙郡平棘人也父系慕容垂散騎侍郎東武城令治有能名太祖定中原以系為平棘令年老卒於家贈寧朔將軍趙郡太守平棘男順博涉經史有才

策知名於世神瑞中中書博士轉中書侍郎始光初從
征蠕蠕以籌略之功拜後軍將軍仍賜爵平棘子加奮
威將軍世祖將討赫連昌謂崔浩曰朕前北征李順獻
策數事實合經略大謀今欲使總攝前驅之事卿以為
何如浩對曰順智足周務實如聖旨但臣與之婚姻深
知其行然性果於去就不可專委世祖乃止初浩弟娶
順妹又以弟子娶順女雖二門婚媾而浩頗輕順順又
弗之伏也由是潛相猜忌故浩毀之至統萬大破昌軍

順謀功居右轉拜左軍將軍後征統萬遷前將軍授之
以兵昌出逆戰順督勒士衆破其左軍及克統萬世祖
賜諸將珍寶雜物順固辭唯取書數千卷世祖善之至
京論功以順為給事黃門侍郎賜奴婢十五戶帛千匹
又從擊赫連定於平涼三秦平遷散騎常侍進爵為侯
加征虜將軍遷四部尚書甚見寵待沮渠蒙遜以河西
內附世祖欲精簡行人崔浩曰蒙遜稱蕃款著河右若
俾遐域流通殊荒畢至宜令清德重臣奉詔褒慰尚書

李順即其人也世祖曰順納言大臣固不宜先為此使
若蒙遜身執玉帛而朝於朕復何以加之浩曰邢貞使
吳亦魏之太常苟事是宜無嫌於重爾日之行豈吳王
入覲也世祖從之以順為太常策拜蒙遜為太傅涼王
使還拜使持節都督秦雍梁益四州諸軍事寧西將軍
開府長安鎮都大將進爵高平公未幾復徵為四部尚
書加散騎常侍延和初復使涼州蒙遜遣中兵校郎楊
定歸白順曰年衰多疹舊患發動腰脚不隨不堪拜伏

比三五日消息小差當相見順曰王之年老朝廷所知以王祇執臣禮別有詔旨豈得自安不見上使也蒙遜翌日延順入至庭中而蒙遜箕坐隱几無動起之狀順正色大言曰不謂此叟無禮乃至於是今則覆亡之不恤而敢陵侮天地魂神逝矣何用見之將握節而出蒙遜使定歸追順於庭曰太常既雅怨哀疾傳云朝廷有不拜之詔是以敢自安耳若太常曰爾拜爾跪而不祇命斯乃小臣之罪矣順益怒曰齊桓公九合諸侯一匡

天下周王賜胙命曰伯舅無下拜而桓公奉遵臣節降而拜受今君雖功高勲厚未若小白之勤朝廷雖相崇重未有不拜之詔如便偃蹇自大此乃速禍之道非圖久安之計若朝廷震怒遂相吞滅悔何及哉蒙遜曰太常規之以古烈懼之以天威敢不翹悚敬聽休命遂拜伏盡禮禮畢蒙遜曰夫恃德者昌恃力者亡朝廷頃來征伐屢克境宇已博但當循理此民亦足興治然專務討擊恐不可常勝順曰昔太祖廓定洪基造有區夏太

宗承統王業惟新自聖上臨御志寧四海是以戎車屢
駕親冒風霜滅赫連於三秦走蠕蠕於漠北闢土開邊
隸首不紀僵屍截馘所在成觀除蕩暴虐存恤黎庶威
震八荒聲被九域自古以來用兵之美未有今日之盛
是以遐方荒俗之氓莫不翹足抗手歛衽屈膝天兵四
臨昭德罰罪何云恃力夫聖王之用兵也征南蠻則北
狄怨討西戎則東夷恨天子安得已哉蒙遜曰誠如來
言則涼土之民亦願魏帝遠至何為復遽驛告警不舍

晝夜意君之所言殆為虛事順曰苗民叛帝舜而親暴君有扈違后啓而從逆主咸懾逼於近地牽制於凶威自古而然豈獨涼民也順既使還世祖問與蒙遜往復之辭及蒙遜政教得失順曰蒙遜專威河石三十許年經涉艱難粗識機變又綏集荒陬遠人頗亦畏服雖不能貽厥孫謀猶足以終其一世前歲表許十月送曇無懺及臣往迎便乖本意不忠不信於是而甚禮者身之與敬者行之本未有不無禮不敬而能久享福祿以臣觀

之不復周矣世祖曰若如卿言則効在無遠其子必復襲世襲世之後早晚當滅順對曰臣略見其子並非才俊能保一隅如聞敦煌太守牧犍器性粗立若繼蒙遜者必此人也然比之於父僉云不逮殆天所用資聖明也世祖曰朕今方事於東未暇營西如卿所言三五年間不足為晚且停前計以為後圖既而蒙遜死問至世祖謂順曰卿言蒙遜死今則驗矣又言牧犍立何其妙哉朕尅涼州亦當不遠於是賜絹千匹廐馬一乘進號

安西將軍寵待彌厚政之巨細無所不參崔浩惡之順

凡使涼州十有二返世祖稱其能而蒙遜數與順遊宴
頗有悖慢之言恐順東還泄之朝廷尋以金寶納順懷
中故蒙遜罪釁得不聞徹浩知之密言於世祖世祖未
之信太延三年順復使涼州及還世祖曰昔與卿密圖
期之無遠但以頃年東伐未遑西顧荏苒之間遂及于
此今和龍既平三方無事比繕甲治兵指營河石掃蕩
萬里今其時也卿往復積歲洞鑒廢興若朕此年行師

當尅以不順對曰臣疇日所啓私謂如然但民勞既久未獲寧息不可頻動以增勞悴願待他年世祖從之五年議征涼州順議以涼州乏水草不宜遠征與崔浩庭諍浩固執以為宜征世祖從浩議及至姑臧甚豐水草世祖與恭宗書以言其事頗銜順後謂浩曰卿昔所言今果驗矣浩曰臣之所言虛實皆如此類初蒙遜有西域沙門曇無讖微有方術世祖詔順令蒙遜送之京邑順受蒙遜金聽其殺之世祖克涼州後聞而嫌順涼土

既平詔順差次羣臣賜以爵位順頗受納品第不平涼
州人徐桀發其事浩又毀之云順昔受牧犍父子重賂
每言涼州無水草不可行師及陛下至姑臧水草豐足
其詐如此幾誤國事不忠若是反言臣讒之於陛下世
祖大怒真君三年遂刑順於城西順死後數年其從父
弟孝伯為世祖知重居中用事及浩之誅世祖怒甚謂
孝伯曰卿從兄往雖誤國朕意亦未便至此由浩譖毀
朕忿遂盛殺卿從兄者浩也皇興初順子敷等貴寵顯

祖追贈順侍中鎮西大將軍太尉公高平王謚曰宣王
妻邢氏曰孝妃順四子

長子敷字景文真君二年選入中書教學以忠謹給侍
東宮又為中散與李訢盧遐度世等並以聰敏內參機
密出入詔命敷性謙恭加有文學高宗寵遇之遷祕書
下大夫典掌要切加前軍將軍賜爵平棘子後兼錄南
部遷散騎常侍南部尚書中書監領內外祕書襲爵高
平公朝政大議事無不關及劉或徐州刺史薛安都司

州刺史常珍奇以彭城懸瓠降附于時朝議謂彼誠偽
未可信保敷乃固執必然曰劉氏喪亂釁起蕭牆骨肉
內離藩屏外叛今以皇朝之靈兵馬之力兼并之會宜
在於今況安都珍奇識機歸命奉誠萬里小民元元企
仰皇化今之事機安可復失於是衆議乃同遣師接援
淮海寧輯敷有力焉敷既見待二世兄弟親戚在朝者
十有餘人弟奕又有寵於文明太后李訢列其惡罪二
十餘條顯祖大怒皇興四年冬誅敷兄弟削順位號為

庶人數從弟顯德妹夫廣平宋叔珍等皆坐關亂公私
同時伏法數兄弟敦崇孝義家門有禮至於居喪法度
吉凶書記皆合典則為北州所稱美既至斯禍時人歎
惜之

數長子伯和次仲良與父俱死伯和走竄歲餘為人執
送殺之伯和有庶子孝祖年小藏免後數妻崔氏得出
宮養之至平涼太守

數弟式字景則學業知名歷散騎常侍平東將軍西充

州刺史濮陽侯式自以家據權要心慮危禍常敕津吏
臺有使者必先啓告然後渡之既而使人平曉卒至津
吏欲先告式使者給云我須南還不停此州不煩令刺
史知也津人信之與使俱渡使者既濟突入執式赴都
與兄俱死

式子憲字仲軌清粹善風儀好學有器度太和初襲爵
又降為伯拜祕書中散雅為高祖所賞稍遷散騎侍郎
接對蕭衍使蕭琛范雲以母老乞歸養拜趙郡太守趙

脩與其州里脩歸葬父母也牧守以下畏之累跡推憲
不為之屈時人高之轉授驍騎將軍尚書左丞長兼吏
部郎中遷長兼司徒左長史定州大中正尋遷河南尹
參議新令於尚書上省永平三年出為左將軍兗州刺
史四年坐事除名後以黨附高肇為御史所劾事具高
聰傳正光二年二月肅宗講於國子堂召憲預聽又以
子騫為國子生四年拜光祿大夫復本爵濮陽伯五年
除持節安西將軍行雍州刺史尋除七兵尚書加撫軍

將軍孝昌初元法僧據徐州反叛詔憲為使持節假鎮
東將軍徐州都督與安豐王延明臨淮王彧等討之會
蕭衍遣其豫章王綜據彭城俄而綜降徐州既平詔遣
兼黃門侍郎常景詣軍慰勞賜憲驊騮馬一匹仍除征
東將軍揚州刺史淮南大都督二年蕭衍遣其平北將
軍元樹右衛將軍胡龍牙護軍將軍夏侯亶等來寇壽
陽樹等從下蔡軍於城之東北亶從黎漿而屯於城南
憲謂不先破元樹等則夏侯亶無由可剋乃遣子長鈞

率衆逆戰軍敗長鈞見執樹等乘之憲力屈以城降因
求還國衍聽歸既至敕付廷尉三年秋憲女壻安樂王
鑒據相州反靈太后謂鑒心懷劫脅遂詔賜憲死時年
五十八永熙中贈使持節侍中都督定冀相殷四州諸
軍事驃騎大將軍儀同三司尚書令定州刺史謚曰文
靜

子希遠字景沖早卒

子祖悛襲祖爵齊受禪例降

希遠兄長鈞興和中梁州驃騎府長史

希遠第二弟希宗字景玄出後憲兄性寬和儀貌雅麗涉獵書傳有文才起家太尉參軍事轉直後領侍御史遷通直散騎常侍尋為東南道行臺郎珍石丞與諸軍討賊於彭沛克之轉齊獻武王大行臺郎中遷散騎常侍中軍大將軍金紫光祿大夫獻武王擢為中外府長史為齊王納其第二女希宗以人望兼美深見禮遇出行上黨大守尋而遘疾興和二年四月卒於郡年四十

贈使持節都督定冀滄瀛殷五州諸軍事驃騎大將軍
司空公殷州刺史謚曰文簡

長子祖昇武定末太子洗馬

希宗弟希仁字景山武定末國子祭酒兼給事黃門侍
郎

希仁弟騫字希義博涉經史文藻富盛年十四國子學
生以聰達見知歷大將軍府法曹參軍太宰府主簿轉
中散大夫遷中書舍人加通直散騎常侍曾為釋情賦

曰單闕之年無射之月余承乏攝官直於本省對九重
之清切望八襲之崢嶸感代序以長懷觀爽氣而軫慮
籠樊之念既多寥廓之想彌切含毫有思斐然成賦猶
潘生之秋興王子之登樓也廁鄭璞於周寶編魚目於
隋珠未敢自同作者蓋亦各言爾志云荷峻極之層構
導積石之洪流有馬形而謨舜亦龍德而史周爰相趙
之鴻烈逮藩魏之優遊為衢樽於上葉號木鐸於前脩
若蓂龍之不隕似窮葉之世濟故抱玉而懷珠且滋蘭

而樹蕙或舟楫以匡時或棲遲以卒歲尚無忝於先人
諒貽厥於來裔書金冊以歲蕤布銀繩而昭晰清風忽
其緬邈啟皇祖於庚寅

李伯仁上東門銘曰上東少陽
厥位在寅條風動物月值孟春

王武子詩曰於顯我王緝乘
斯民俊明有德嚴恭惟寅

逢軒教之方洽遇周命之

惟新譬龍虎其有合信山川而降神若勝庭之五傑似
不速之三人協嗜欲於將至豈物色而方臻荷天寵以
來儀步康衢而騁力如乾元之利貞若坤四之方直內
弼諧於本朝外闢土於殊域乘紫氛以厲羽負青天而

鼓翼既公侯之必復亦慶緒之所融績並樹於八凱道
俱升於二宮遂遵流以至海且因岳而為嵩同羽儀於
班氏均載德於楊公何日月之逾邁引寒暑而相終委
晉會於弱齒遺堂構於微躬嗟蒙昧之無取故告舍
而不及已濩落而少成又擁腫而無立愧精堅於百鍊
慙忠信於十邑非珪璋之特達詎芳菲之易襲未砥礪以
自進寧琢磨而成章乖宋子之萬宇異應生之五行不
請觀於石室豈借書於晉皇求班莊而不遂況蔡文之

可望參四科其未獲入三選而誰許本無聲於梁魏故
未聞於陳汝居玉石以多迷宅顯晦而乖所既無懷於
四至安有情於再舉雖衣冠之末胄而世祿之緒餘等
渤澥之乘鴈類九戔之逃魚處江淮而不變對朝市而
閑居空闔門以靖軌非論道而脩書少賓客於季彥謝
朋交於太初在正光之御厯實明皇之拱己曾問政於
上學著為君而我齒呌閭人以望予遂陟降於庭止同
崔駟之謁帝若謝兼之來仕逮孝莊之入統乃道喪而

時昏水羣飛於溟海火載燎於中原延膠船而越水若
朽索而乘奔玉羊失而無御金雞亡而不存天步忽其
多難橫流且其云始既雲擾而海沸亦岳立而碁峙睇
三網之日紊見四維之不理顧茂草以傷懷視匪車而
思起雖風雨之如晦亮膠喑而不已自牽役於宰朝實
有懷於胥恥在下僚而棲屑願奮迅於泥滓睠故鄉以
臨睨悵有動於思歸越來流以鼓枻溯北風而結驂入
成都之舊宅反觀津之故扉乃曲肱而不悶信抱甕而

無機且耕而食且蠶而衣恒一日以自省亦三月而無
違遊仁義之肴覈採墳素之精微誠因閑而養拙亦有
樂於嘉肥及勾芒御節姑洗之首散遲遲於麗日發依
依於弱柳鳥間關以呼庭花芬披而落牖聽乃越於笙
簧望有踰於新婦襲成服以逍遙願良辰而聊厚乃席
壠而踞石遂嘯嘯而命偶同浴沂之五六似禊浴之八
九或促膝以持肩或援笙而鼓缶賓奉萬年之觴主報
千金之壽各笑語而卒獲傳禮儀於不朽斯蓋先民之

所樂而余心之所守也至於少昊為帝庚辛處躔視墟
里之蕭蕭過寒夜之綿綿積霜霤於近援起沱零於遠
天思多端以類長若臨水而登山幸出遊之或寫冀觀
濤之可蠲遂杖策緩步或漁或田弋鳬鴈於清溪釣魴
鯉於深泉張廣幕布長筵酌濁酒割芳鮮起白雪於促
柱奉綠水於危弦賦湛露而不已歌驪駒而未旋跌蕩
世俗之外疎散造化之間人生行樂聊用永年悟柱下
之稱工聞首陽之為拙既有惜於旅懸且自悲於井渫

訪鄭詹之格言求季主之高說去衡門以策駟望象魏
而投轍服毳衣以從務乘大車而就列比汗海而無紀
喻江河而有缺矐重地而懼深念索米而慙結運有折
於玉斗時忽亡於金鏡始蒙塵以播蕩卒流彘而居鄭
彼上天之降鑒實下民之請命因艱難以隆基據殷憂
而啓聖調南風以負宸居北辰而為政創彝倫於九疇
班平章於百姓喻繩契以論蹤援成昭而比盛酌徒鎬
之故典究遷亳之遺令奄四海以為家開七百而增慶

覩禮樂之方隆信光華之始映百揆鬱以時序四門穆
其惟清如得人於漢世比多士於周庭有一匡以作相
或十亂而為楨各秉文而經武故天平而地成伊余身
之忝穢得再入於承明執綸言之猶紉戴會弁之如星
非巡潰以窺井信夕惕而懷驚承周任之有言攬老子
之知足奉炯誠以周旋抱徽猷而與屬每有偃於唯塵
恒興言於寵辱思散髮以抽簪願全真而守朴睠疎傳
以徘徊望申公而躑躅冀鄙志之獲展庶微願之逢時

歌致命而可卜詠歸田而有期揖帝城以高逝與人事

而長辭擊壤而頌結草而嬉援巢父以戲潁追許子而
升箕供暮餐於沆瀣給朝餌於瓊芝同糟醅而無別混
名實而不治放言肆慾無慮無思何鷦鷯之可賦鴻鵠
之為詩哉尋加散騎常侍殷州大中正鎮南將軍尚書
左丞仍以本官兼散騎常侍使蕭衍後坐事免論者以
為非罪騫嘗贈親友盧元明魏收詩曰幽棲多暇日總
駕萃荒垆南瞻帶宮雉北睇拒畦瀛流火時將末懸炭

漸云輕寒風率已厲秋水寂無聲層陰蔽長野凍雨暗
窮汀侶浴浮還沒孤飛息且驚三禡俄終歲一丸曾未
營閑居同洛溪歸身歎武城稍旅原思翟坐夢尹懃荆
監河愛斗水蘇子惜餘明益州達友趣廷尉辯交情豈
若忻蓬華收志偶沉冥後詔兼太府少卿尋除征南將
軍給事黃門侍郎死於晉陽所著詩賦碑誄別有集錄
贈本將軍太常殷州刺史齊受禪重贈使持節侍中都
督殷滄二州諸軍事車騎大將軍儀同三司仍殷州刺

史謚曰文惠

騫弟希禮字景節武定末通直散騎常侍

希遠庶長兄劔興和中梁州驃騎府長史

式弟奕字景世美容貌有才藝早歷顯職散騎常侍宿衛監都官尚書安平侯與兄數同死太和初文明太后追念奕兄弟乃誅李訢存問憲等一二家歲時賜以布帛

奕別生弟罔字道度少為中散逃避得免太和中拜下

大夫南部給事出為龍驤將軍南豫州刺史還拜冠軍將軍尋除光祿大夫守度支尚書二十一年高祖幸長安岡以咸陽山河險固秦漢舊都古稱陸海勸高祖去洛陽而都之後高祖引見笑而謂之曰卿一昨有啓欲朕都此昔婁敬一說漢祖即日西駕尚書今以西京說朕仍使朕不廢東轅當是獻可理殊所以今古相反耳岡對曰昔漢祖起於布衣欲藉嶮以自固婁敬之言合於本旨今陛下百世重光德洽四海事同隆周均其職

貢是以愚臣獻說不能上動高祖大悅其年罔卒賜錢二十萬布百匹朝服一具衣一襲罔性鯁烈敢直言常面折高祖彈駁公卿無所回避百寮皆憚之高祖常加優禮故車駕巡幸恒兼尚書右僕射雖才學不及諸兄然公彊當世堪濟過之

子祐字長禧篤穆友于見稱於世歷位給事中尚書祠部郎相州撫軍府長史司空從事中郎博陵太守所在亦以清幹著稱

祐弟太字季寧涉歷書傳太尉行軍員外郎

順弟修基陳留太守卒

子探幽

探幽兄子洪鸞河間太守

洪鸞孫悌傑樂陵太守武定中以貪汙賜死

脩基季弟暉字善祖小字藥囊少有高名為中書侍郎

從世祖征涼州戰沒時人咸惜焉初順與從兄靈從弟

孝伯並以學識器業見重於時故能砥礪宗族競名修

尚靈與族叔詵族弟熙等俱被徵事在高允高士頌

詵字令孫京兆太守詵後繼闕

秀林小名槿性彊直太和中自中書博士為頓丘相豪
右畏之景明初試守博陵郡抑彊扶弱政以威嚴為名
以母憂去職後為太尉諮議參軍假節行荊州事拜司
徒司馬加冠軍將軍定州大中正太中大夫正光中卒
年六十三贈左將軍齊州刺史

子裔字徽伯出後秀林兄鳳林裔初除汝南王悅常侍

稍遷定州別駕孝昌中為定州鎮軍長史加輔國將軍
帶博陵太守于時逆賊杜洛周侵亂州界尋假平北將
軍防城都督賊既圍城裔潛引洛周州遂陷沒洛周僭
竊特無綱紀至於市令驛帥咸以為王呼曰市王驛王
乃封裔為定州王洛周尋為葛榮所滅裔仍事榮永安
初爾朱榮既擒葛榮遂繫裔及高敖曹薛脩義李無為
等於晉陽從榮至洛榮死乃免普泰初以裔為持節散
騎常侍安北將軍兼給事黃門侍郎慰勞山東大使永

熙中除鎮東將軍金紫光祿大夫齊獻武王大丞相諮
議參軍天平初以預定策之功封固安縣開國伯食邑
四百戶加征東將軍車駕遷鄴為大行臺右丞留在洛
陽監修宮殿尋除使持節大將軍陝州刺史四年八月
宇文黑獺攻陷州城被執見害年五十詔贈使持節都
督定冀瀛殷四州諸軍事驃騎大將軍尚書令司徒公
定州刺史

子直襲武定末司徒屬齊受禪例降

裔弟景義大司馬諮議參軍殷州大中正

景義弟伯穆武定末合州刺史

秀林從弟煥字仲文小字醜瓌有幹用少與酈道元俱
為李彪所知自給事中轉治書侍御史恒州刺史穆泰
據代都謀反高祖詔煥與任城王澄推治之煥先驅至
州宣旨曉喻仍誅泰等景明初遷司空從事中郎蕭寶
卷豫州刺史裴叔業以壽春歸附詔煥以本官為軍司
與楊大眼奚康生等率眾迎接煥至淮西叔業兄子植

遣使送質煥等濟師入城撫慰民咸忻悅仍行揚州事
賜爵容城伯軍還行河內郡事拜司徒右長史以荆蠻
擾動敕煥兼散騎常侍慰勞之降者萬餘家除輔國將
軍梁州刺史時武興氏楊集起舉兵作逆令弟集義邀
斷白馬戍敕假煥平西將軍督別將石長樂統軍王祐
等與軍司苟金養俱討之大破集起軍會秦州民呂苟
兒反煥仍令長樂等由麥積崖赴援屬都督元麗至遂
共平之時氏王楊定進猶據方山與苟兒影響煥密募

氏趙芒路斬定進還朝遇患卒時年四十四贈征虜將軍幽州刺史謚曰昭

子密武定中襄州刺史

秀林族子肅字彥邕歷奉朝請清河王懌郎中令稍遷洛陽令步兵校尉員外常侍初諂附侍中元暉後以左道事侍中穆紹常裸身被髮畫腹銜刀於隱屏之處為紹求福故紹愛之延昌四年薦肅為黃門郎加光祿大夫肅為性酒狂熙平初從靈太后幸江陽王繼第肅時

侍飲頗醉言辭不遜抗辱太傅清河王懌為有司彈劾
靈太后怒之出為章武內史歲餘遷右將軍夏州刺史
卒贈左將軍齊州刺史

肅從弟暉字景林有學識初除奉朝請太學博士司空
主簿以母憂去職服闋拜左軍將軍正光中元乂以其
弟羅為青州刺史暉為羅平東府長史遷廷尉少卿殷
州太中正孝昌二年冬卒年五十七贈平東將軍齊州
刺史謚曰宣

子慎武定中東平太守

暉從弟仲璇奉朝請定雍二州長史太尉諮議中散太
中大夫東郡汲郡二郡太守司徒左長史弘農太守先
是宮牛二姓阻嶮為害仲璇示以威惠並即歸伏還除
衛將軍金紫光祿大夫仍除北雍州刺史將軍如故轉
車騎將軍左光祿大夫天平初遷都於鄴以仲璇為營
構將作進號衛大將軍出除車騎大將軍兗州刺史仲
璇以孔子廟牆宇頗有頽毀遂改修焉還除將作大匠

所歷並清勤有聲年六十六卒贈驃騎大將軍儀同三司青州刺史

子希良侍御史

詵從子善犯孝靜諱趙郡太守

子顯進州主簿

顯進子映字輝道南安王國常侍光州征虜府主簿相州治中寧朔將軍步兵校尉孝昌三年冬卒年四十二天平中贈通直散騎常侍輔國將軍殷州刺史

子晉濟武定中北海太守

映弟育字仲遠奉朝請稍遷揚烈將軍奉車都尉都督相州防城別將以拒葛榮之勲賜爵趙郡公後除征東將軍金紫光祿大夫天平四年夏卒年五十七贈驃騎大將軍都官尚書定州刺史謚曰貞

子惜襲武定末齊文襄王大將軍府記室參軍齊受禪爵例降

顯進弟恃顯位至左中郎將卒贈中壘將軍安州刺史

恃顯養京兆王愉妾楊氏為女愉改楊姓為李而親念
恃顯恃顯子道舒與愉同逆愉敗走免

第三子道璩武定末范陽太守

道璩弟道瓘少以父謹被刑位至中常侍

恃顯弟曄字季顯涉歷書史司徒行參軍稍遷濟州輔
國府長史坐兄事免後除尚書中兵郎遷冠軍中散大
夫正光二年南荊州刺史桓叔興驅掠城民叛入蕭衍
衍資以兵糧令築谷陂城以立洛州逼土山戍詔曄持

節兼尚書左丞為行臺督諸軍討叔興大破之乘勝拔
谷陂叔興退走軍還仍除尚書左丞出除洛州刺史將
軍如故未拜卒贈左將軍齊州刺史

子暉賓美容貌寬和沉雅太學博士

暉賓弟山儒少而清立學涉羣書山儒少弟大蓋並早
卒

暉族弟孝怡字悅宗中書學生相州高陽王雍主簿廣
陵王羽掾新蔡太守別將蕭寶夤長史從中山王英破

蕭衍臨川王蕭宏於梁城除朔州安北府長史又為中
堅將軍相州鎮北府長史遷冠軍將軍魏郡太守相州
刺史中山王熙據鄴起兵也孝怡陰結募城民與熙長
史柳元章別駕游荆之等率衆擒熙賞爵昌樂伯靈太
后反政以孝怡又黨除名為民後安樂王鑒鎮鄴起孝
怡為別將永安初除左將軍太中大夫仍為防城都督
以拒葛榮之勲賜爵趙郡公拜撫軍將軍光祿大夫永
安三年行殷州事遷驃騎大將軍左光祿大夫武定六

年卒年八十三

子思道儀同開府中兵參軍武城縣公

熙字仲熙神廳中與高允等俱被徵拜中書博士轉侍郎以使沮渠有功賜爵元氏子加中壘將軍卒贈鎮東將軍豫州刺史謚曰莊

子季王襲卒贈青州刺史謚曰貞

子遺元襲初除冀州趙郡王幹東閣祭酒累轉尚書左民郎中冀州京兆王愉功曹參軍帶扶柳令為愉所親

逼與同反愉敗遺元逃竄會赦乃雪復除兗州平東府
長史後拜中堅將軍殷州征北將軍長史卒年六十三
贈征北將軍定州刺史

子恃寧以父事被刑武定末官至中尹

恃寧弟子寧襲爵開府默曹參軍齊受禪爵例降

熙族孫蘭和自右軍將軍歷平陽勃海二郡太守

蘭和弟蘭集平昌太守

熙族孫同軌體貌魁岸腰帶十圍學綜諸經多所治誦

兼讀釋氏又好醫術年二十二舉秀才射策除奉朝請
領國子助教轉著作郎典儀注修國史遷國子博士加
征虜將軍永熙二年出帝幸平等寺僧徒講說勅同軌
論難音韻間朗往復可觀出帝善之三年春釋菜詔延
公卿學官於顯陽殿敕祭酒劉歊講孝經黃門李郁講
禮記中書舍人盧景宣解大戴禮夏小正篇時廣招儒
學引令預聽同軌經義素優辯析兼美而不得執經深
為慨恨太平中轉中書侍郎興和中兼通直散騎常侍

使蕭衍衍深耽釋學遂集名僧於其愛敬同泰二寺講
涅槃大品經引同軌預席衍兼遣其臣並共觀聽同軌論
難久之道俗咸以為善盧景裕卒齊獻武王引同軌在
館教諸公子甚嘉禮之每旦入授日暮始歸緇素請業
者同軌夜為解說四時恒爾不以為倦武定四年夏卒
年四十七時人傷惜之齊獻武王亦殊嗟悼賻祿甚厚
贈驃騎大將軍瀛州刺史謚曰康

同軌兄義深武定中齊州刺史

同軌弟幼舉安德太守武定中以在郡貪汙輒召部曲還京師棄市

幼舉弟之良有幹用前將軍尚書金部郎卒

之良弟稚廉武定末并州儀同開府長史

史臣曰李順器宇才識一時推重謀宣中國氣折外蕃所以世祖垂心而崔浩側目敷弑兄弟位望並高憲風度恢雅夙重朝列而遭隋有命報施俱爽嗚呼以茲盛德克廣其猷宗緒扶疎人位盛顯可謂李雖舊族其世

唯新矣

魏書卷三十六

魏書卷三十六考證

李順傳推憲不為之屈○北史作憲不為屈此推字殆
惟字之訛也

啟皇祖於庚寅○本書本無注此獨引李伯仁上東門
銘厥位在寅王武子詩嚴恭唯寅作注又與本句庚
寅全不相涉未詳其故

魏書卷三十六考證

欽定四庫全書薈要卷四千四百五十六

史部

魏書卷三十七

齊

魏

收

撰

列傳第二十五

司馬休之

司馬楚之

司馬景之

司馬叔璠

司馬天助

司馬休之字季豫本河內溫人晉宣帝季弟譙王進之後也司馬叡僭立江南又以進子孫襲封至休之父恬

為司馬昌明鎮北將軍青兗二州刺史天興五年休之
為司馬德宗平西將軍荊州刺史為桓玄逼逐遂奔慕
容德劉裕誅玄後還建鄴裕復以休之為荊州刺史休
之頗得江漢人心劉裕疑其有異志而休之子文思繼
休之兄尚之為譙王謀圖裕裕執送休之令自為其所
休之表廢文思并與裕書陳謝神瑞中裕收休之子文
實兄子文祖並殺之乃率衆討休之休之上表自陳於
德宗與德宗鎮北將軍魯宗之宗之子竟陵太守軌等

起兵討裕裕軍至江陵休之不能敵遂與軌奔襄陽裕復進軍討之太宗遣長孫嵩屯河東將為之援時姚興征虜將軍姚成王冠軍將軍司馬國璠亦將兵救之不及而還休之遂與子文思及宗之等奔於姚興裕滅姚泓休之與文思及德宗河間王子道賜輔國將軍溫楷竟陵內史魯軌荊州治中韓延之殷約平西參軍桓謐桓璩及桓溫孫道度道子勃海刁雍陳郡袁式等數百人皆將妻子詣嵩降月餘休之卒于嵩軍詔曰司馬休

之率其同義萬里歸誠雅操不遂中年殞喪朕甚愍焉
其追贈征西大將軍右光祿大夫謚始平聲公

文思與淮南公國璠池陽子道賜不平而偽親之引與
飲宴國璠性疏直因酒醉遂語文思言已將與溫楷及
三城胡酋王珍曹栗等外叛因說京師豪彊可與為謀
數十人文思告之皆坐誅以文思為廷尉卿賜爵鬱林
公善於其職聽訟斷獄百姓不復匿其情劉義隆遣將
裴方明擊楊難當於仇池世祖以文思為假節征南大

將軍進爵譙王督洛豫諸軍南趣襄陽邀其歸路還京
為懷朔鎮將興安初薨

子彌陀襲爵以選尚臨涇公主而辭以先取毘陵公竇
瑾女與瑾並坐祝詛伏誅

司馬楚之字德秀晉宣帝弟太常胤之八世孫父榮期
司馬德宗梁益二州刺史為其參軍楊承祖所殺楚之
時年十七送父喪還丹陽值劉裕誅夷司馬戚屬叔父
宣期兄貞之並為所殺楚之乃亡匿諸沙門中濟江自

歷陽西入義陽竟陵蠻中及從祖荊州刺史休之為裕
所敗乃亡於汝潁之間楚之少有英氣能折節待士與
司馬順明道恭等所在聚黨及劉裕自立楚之規欲報
復收衆據長社歸之者常萬餘人劉裕深憚之遣刺客
沐謙害楚之楚之待謙甚厚謙夜詐疾知楚之必自來
因欲殺之楚之聞謙病果自齋湯藥往省之謙感其意
乃出匕首於席下以狀告之曰將軍為裕所忌憚願不
輕率以保全為先楚之歎曰若如來言雖有所防恐有

所失謙遂委身以事之其推誠信物得士之心皆此類也太宗末山陽公奚斤略地河南楚之遣使請降因表曰江淮以北聞王師南首無不抃舞思奉德化而逼於寇逆無由自致臣因民之欲請率慕義為國前驅今皆白衣無以制服人望若蒙偏裨之號假王威以唱義則莫不率從於是假楚之使持節征南將軍荊州刺史奚斤既平河南以楚之所率戶民分置汝南南陽南頓新蔡四郡以益豫州世祖初楚之遣妻子內居於鄴尋徵

入朝時南藩諸將表劉義隆欲入為寇以楚之為使持節安南大將軍封琅邪王屯潁川以距之其長史臨邑子步還表曰楚之渡河百姓思舊義衆雲集汝潁以南望風翕然回首草面斯誠陛下應天順民聖德廣被之所致也世祖大悅璽書勞勉賜前後部鼓吹義隆將到彥之沂河而西列守南岸至於潼關及彥之等退走楚之破其別軍於長社又與冠軍將軍安頡攻滑臺拔之擒義隆將朱脩之李元德及東郡太守申謨俘萬餘人

上疏曰臣奉命南伐受任一方而智力淺短誠節未効
所以夙夜憂惶忘寢與食臣屢遣人至荆揚所在陳說
具論天朝盛化之美莫不忻承聖德傾首北望而義隆
兄弟知人情搖動遣臣私讐順為司州刺史統淮北七
郡代垣苗守懸瓠自鞏洛滑臺敗散以來義隆恥其敗
北多加罪罰到彥之削位退同卒伍殺姚縱夫於壽春
斬竺靈秀於彭城王休元託疾擅道濟斥放凡在腹心
悉懷疑阻民怨臣猜可謂今日臣聞平殄寇逆必乘戰

勝之威建立功勲亦因離貳之勢伏惟陛下聖德膺符
道光四海神旌所指莫不摧服其未賓者義隆而已今
天網遐舉殊方仰德固宜掃清東南齊一區宇使濟濟
之風被於江漢世祖以兵久勞不從以散騎常侍徵還
從征涼州以功賜隸戶一百義隆遣將裴方明胡崇之
寇仇池以楚之為假節與淮陽公皮豹子等督關中諸
軍從散關西入擊走方明擒崇之仇池平而還車駕伐
蠕蠕詔楚之與濟陰公廬中山等督運以繼大軍時鎮

北將軍封沓亡入蠕蠕說令擊楚之等以絕糧運蠕蠕
乃遣奸覘入楚之軍截驢耳而去有告失驢耳者諸將
莫能察楚之曰必是覘賊截之以為驗耳賊將至矣即
使軍人伐柳為城水灌之令凍城立而賊至冰峻城固
不可攻逼賊乃走散世祖聞而嘉之尋拜假節侍中鎮
西大將軍開府儀同三司雲中鎮大將朔州刺史王如
故在邊二十餘年以清儉著聞和平五年薨時年七十
五高宗悼惜之贈都督梁益秦寧四州諸軍事征南大

將軍領護西戎校尉揚州刺史謚貞王陪葬金陵

長子寶胤與楚之同入國拜中書博士鴈門太守卒

楚之後尚諸王女河內公主生子金龍字榮則少有父

風初為中書學生入為中散顯祖在東宮擢為太子侍

講後襲爵拜侍中鎮西大將軍開府雲中鎮大將朔州

刺史徵為吏部尚書太和八年薨贈大將軍司空公冀

州刺史謚康王贈絹一千疋金龍初納太尉隴西王源

賀女生子延宗次纂次悅後娶沮渠氏生徽亮即河南

王沮渠牧犍女世祖妹武威公主所生也有寵於文明
太后故以徽亮襲例降為公坐連穆泰罪失爵延宗父
亡後數年卒

子喬字承業世宗時悅等為喬理嫡還襲祖爵位至後
軍將軍卒贈征虜將軍洛州刺史

子藏襲齊受禪例降

纂字茂宗中書博士歷司州治中別駕河內邑中正永
平元年卒贈鎮遠將軍南青州刺史謚曰肅

子澄字元鏡司州秀才司空功曹參軍給事中卒贈龍驤將軍夏州刺史

澄弟仲粲武定中尚書左丞

悅字慶宗自司空司馬出為立節將軍建興太守轉寧朔將軍司州別駕遷太子左衛率河北太守世宗初除鎮遠將軍豫州刺史時有汝南上蔡董毛奴者齎錢五千死在道路郡縣疑民張堤為劫又於堤家得錢五千堤懼拷掠自誣言殺獄既至州悅觀色察言疑其不實

引見毛奴兄靈之謂曰殺人取錢當時狼狽應有所遺
此賊竟遺何物靈之云唯得一刀鞘而已悅取鞘視之
曰此非里巷所為也乃召州城刀匠示之有郭門者前
曰此刀鞘門手所作去歲賣與郭民董及祖悅收及祖
詰之曰汝何故殺人取錢而遺刀鞘及祖歛引靈之又
於及祖身上得毛奴所著皂襦及祖伏法悅之察獄多
此類也豫州于今稱之悅與鎮南將軍元英攻義陽克
之詔改蕭衍司州為郢州以悅為征虜將軍郢州刺史

蕭衍遣其豫州刺史馬仙琕左軍將軍永陽戍主陳可
等率衆一萬於三關南六十里因山起城名為竹墩遣
其輔國將軍濟陰太守薊沛精卒二千以戍之後於關
南四十里麻陽舊柵起城仙琕輕騎東南為之節度關
南之民多懷兩望悅令西關統軍諸靈鳳掩擊敗之盡
燔其城樓儲積擒薊沛及其輔國將軍軍主劉靈秀詔
曰司馬悅首謀義陽征略有捷且違京既久屢請入朝
可遂此志聽其赴闕尋詔以本將軍為豫州刺史論義

陽之勲封漁陽縣開國子食邑三百戶永元元年城人
白早生謀為叛逆遂斬悅首送蕭衍既而邢巒復懸瓠
詔曰司馬悅暴罹橫酷身首異所國戚舊勲特可悼念
主書董紹銜命公行囚漂殊域事可矜愍尚書可量賊
將齊苟兒等四人之中分遣二人勅揚州為移以易悅
首及紹迎接還本用慰亡存贈平東將軍青州刺史賜
帛三百疋謚曰莊子肱襲爵

肱尚世宗妹華陽公主拜駙馬都尉特除員外散騎常

侍加鎮遠將軍正光五年公主薨月餘肱卒贈左將軍
滄州刺史

子鴻字慶雲性麤武襲爵位至都水使者坐與西賊交
通賜死

子孝政襲齊受禪爵例降

金龍弟躍字寶龍尚趙郡公主拜駙馬都尉代兄為雲
中鎮將朔州刺史假安北將軍河內公躍表罷河西苑
封與民墾殖有司執奏此廩鹿所聚太官取給今若與

民至於奉獻時禽懼有所闕詔曰此地若任稼穡雖有
獸利事須廢封若是山澗虞禁何損尋先朝置此豈苟
藉斯禽亮亦以俟軍行薪蒸之用其更論之躍固請宜
以與民高祖從之還為祠部尚書大鴻臚卿潁川王師
以疾表求解任太和十九年卒贈金紫光祿大夫賜朝
服一具衣一襲絹一千疋楚之父子相繼鎮雲中朔土
服其威德

司馬景之字洪略晉汝南王亮之後太宗時歸闕爵蒼

梧公加征南大將軍清直有節操太宗甚重之卒贈汝南王

子師子襲爵

景之兄準字巨之以泰常末率三千餘家歸國時太宗在虎牢授寧遠將軍新蔡公假相州刺史隨駕至京出除廣寧太守悅近來遠清儉有稱世祖嘉之賜布六百疋後降號為平遠將軍改為密陵侯興光初卒

子安國襲爵

司馬叔璠晉安平獻王孚之後也父曇之司馬德宗河
間王桓玄劉裕之際叔璠與兄國璠北奔慕容超後西
投姚興劉裕滅姚泓北奔屈丐世祖平統萬兄弟俱入
國國璠賜爵淮南公卒無子爵除祖璠安遠將軍丹楊
侯卒

長子靈壽神麋中與弟道壽俱來歸國靈壽冠軍將軍
溫縣侯道壽寧朔將軍宜陽子靈壽出除陳郡太守劉
義隆侵境詔靈壽招引義士得二千餘人從西平公安

頡破虎牢滑臺洛陽三城徙五百餘家入河內又從討
蠕蠕西征涼州所在著功出為遼西太守治有清儉之
稱太和九年卒贈懷州刺史謚曰靖靈壽娶太宰頡丘
王李峻女與婦父雅不相善每見抑退故位不大至
子惠安高祖時襲爵歷恒州別駕桑乾太守太尉諮議
參軍事卒

子祖珍年十五舉司州秀才解褐員外散騎侍郎年十
八先父卒

祖珍弟宗龐世宗時父惠安以久病啟以爵轉授解褐
安定王府騎兵參軍洛州龍驤府司馬善射未曾自伐
性閑淡少所交遊識者云其淳至永安中卒

子嵩亮襲

惠安弟直安歷位尚書郎濟北濟南二郡太守員外散
騎常侍蕭寶夤征鍾離引為長史坐軍退免官加刑以
疾得免尋除東平原太守還京為中散大夫加征虜將
軍太中大夫遷左將軍正光四年卒贈大將軍濟州刺

史

子龍泉滄州開府長史

道壽長子元興襲父爵

子景和給事中稍遷揚州驃騎府長史清河內史正光元年卒贈左將軍平州刺史

元興弟仲明侍御史中書舍人以謹敏著稱稍遷衛尉少卿仍領舍人出為征虜將軍涼州刺史坐貪殘為御史所彈遇赦免積年不叙後娶靈太后從姊為繼室除

武衛將軍征虜將軍轉光祿大夫武衛如故遷大司農卿加安東將軍散騎常侍出為安北將軍恒州刺史常侍如故正光五年卒

子彥邕有風望正員郎稍遷相州刺史驃騎大將軍左光祿大夫天平四年卒贈散騎常侍都督懷洛二州諸軍事驃騎大將軍儀同三司懷州刺史

司馬天助自云司馬德宗驃騎將軍元顯之子劉裕自立乃來歸闕除平東將軍青徐二州刺史東海公天助

招率義士欲襲裕東平濟北二郡及城戍又破裕將閭
萬齡軍前後多所虜獲拜侍中都督青徐兗三州諸軍
事征東將軍青兗二州刺史公如故真君三年與司馬
文思等南討還又從駕北征在陣歿

子元伯字歸都襲爵後降溫縣子太和中為建威將軍
泰山太守

史臣曰諸司馬以亂亡歸命楚之風槩器略最可稱乎
其餘未足論也而以往代遺緒竝當位遇可謂幸矣

魏書卷三十七

魏書卷三十七考證

司馬叔璠傳丹楊侯○楊一本作陽晉書地理志丹陽
郡有丹楊縣注丹陽山多赤柳在西也今人槩改楊
為陽誤矣

魏書卷三十七考證

謹案卷三十六第二頁前三行唯取書數千卷刊
本千訛十據北史及毛本改

第十四頁前八行傳禮儀於不朽刊本儀訛義據
毛本改

第十五頁後五行信夕惕而懷驚刊本惕訛陽今
改

第十六頁後四行益州達友趣刊本友訛反據北
史改



覆校官編修臣方燁

校對官檢討臣王鍾健

謄錄監生臣李帶雙

欽定四庫全書薈要

史部

魏書卷三十八至
四十

詳校官內閣侍讀臣孫球



欽定四庫全書薈要卷四千四百五十七

史部

魏書卷三十八

齊

魏

攷

撰

列傳第二十六

刁雍

王慧龍

韓延之

袁式

刁雍字淑和渤海饒安人也高祖攸晉御史中丞曾祖
協從司馬叡渡江居于京口位至尚書令父暢司馬德
宗右衛將軍初暢兄逵以劉裕輕狡薄行負社錢三萬

違時不還執而徵焉及裕誅桓玄以嫌故先誅刁氏雍
為暢故吏所匿奔姚興豫州牧姚紹於洛陽後至長安
雍博覽書傳姚興以雍為太子中庶子泰常二年姚泓
滅與司馬休之等歸國上表陳誠於南境自効太宗許
之假雍建義將軍雍遂於河濟之間招集流散得五千
餘人南阻大關闕擾動徐兗建牙誓衆傳檄邊境劉裕遣
將李嵩等討雍雍斬之於蒙山於是衆至二萬進屯固
山七年三月雍從弟彌亦率衆入京口規共討裕裕遣

兵破之六月雍又侵裕青州雍敗乃收散卒保於馬耳山又為裕青州軍所逼遂入大鄉山八年太宗南幸鄴朝於行觀問先聞卿家縛劉裕於卿親疎雍曰是臣伯父太宗笑曰劉裕父子當應憚卿又謂之曰朕先遣叔孫建等攻青州民盡藏避城猶未下彼既素憚卿威士民又相信服今欲遣卿助建等卿宜勉之於是假雍鎮東將軍青州刺史東光侯給五萬騎使別立義軍建先攻東陽雍至招集義衆得五千人遣撫慰郡縣土人盡

下送租供軍是時攻東陽平其北城三十許步劉義符
青州刺史竺夔於城內鑿地道南下入澗水澗以為退
路雍謂建曰此城已平宜時入取不者走盡建懼傷兵
士難之雍曰若懼傷官兵者雍今請將義兵先入建不
聽夔欲東走會義符遣其將檀道濟等救青州雍謂建
曰賊畏官軍突騎以鎖連車為函陣大峴已南處處狹
隘不得方軌雍求將義兵五千要嶮破之建不聽曰兵
人不宜水土疫病過半若相持不休兵自死盡何須復

戰今不損大軍安全而返計之上也建乃引還雍遂鎮
尹卯固又詔令南入以亂賊境雍攻克項城會有勅追
令隨機立効雍於是招集譙梁彭沛民五千餘家置二
十七營遷鎮濟陰延和二年立徐州於外黃城置譙梁
彭沛四郡九縣以雍為平南將軍徐州刺史賜爵東安
侯在鎮七年太延四年徵還京師頻歲為邊民所請世
祖嘉之真君二年復授使持節侍中都督揚豫兗徐四
州諸軍事征南將軍徐豫二州刺史三年劉義隆將裴

方明寇陷仇池詔雍與建興公古弼等十餘將討平之
五年以本將軍為薄骨律鎮將至鎮表曰臣蒙寵出鎮
奉辭西藩總統諸軍戶口殷廣又總勒戎馬以防不虞
督課諸屯以為儲積夙夜惟憂不遑寧處以今年四月
末到鎮時以夏中不及東作念被農夫雖復布野官渠
乏水不得廣殖乘前以來功不充課兵人口累率皆飢
儉略加檢行知此土稼穡艱難夫欲育民豐國事須大
田此土乏雨正以引河為用觀舊渠堰乃是上古所制

非近代也富平西南三十里有艾山南北二十六里東
西四十五里鑿以通河似禹舊迹其兩岸作溉田大渠
廣十餘步山南引水入此渠中計昔為之高於水不過
一丈河水激急沙土漂流今日此渠高於河水二丈三
尺又河水浸射往往崩頽渠溉高懸水不得上雖復諸
處按舊引水水亦難求今艾山北河中有洲渚水分為
二西河小狹水廣百四十步臣今求入來年正月於河
西高渠之北八里分河之下五里平地鑿渠廣十五步

深五尺築其兩岸令高一丈北行四十里還入古高渠
即循高渠而北復八十里合百二十里大有良田計用
四千人四十日功渠得成訖所欲鑿新渠口河下五尺
水不得入今求從小河東南岸斜斷到西北岸計長二
百七十步廣十步高二丈絕斷小河二十日功計得成
畢合計用功六十日小河之水盡入新渠水則充足溉
官私田四萬餘頃一旬之間則水一遍水凡四溉穀得
成實官課常充民亦豐贍詔曰卿憂國愛民知欲更引

河水勸課大田宜便興立以克就為功何必限其日數
也有可以便國利民者動靜以聞七年雍表曰奉詔高
平安定統萬及臣所守四鎮出車五千乘運屯穀五十
萬斛付沃野鎮以供軍糧臣鎮去沃野八百里道多深
沙輕車來往猶以為難設令載穀不過二十石每涉深
沙必致滯陷又穀在河西轉至沃野越渡大河計車五
千乘運十萬斛百餘日乃得一返大廢生民耕墾之業
車牛艱阻難可全至一歲不過二運五十萬斛乃經三

年臣前被詔有可以便國利民者動靜以聞臣聞鄭白之渠遠引淮海之粟沂流數千周年乃得一至猶稱國有儲糧民用安樂今求於牽屯山河水之次造船二百艘二船為一舫一船勝穀二千斛一舫十人計須千人臣鎮內之兵率皆習水一運二十萬斛方舟順流五日而至自沃野牽上十日還到合六十日得一返從三月至九月三返運送六十萬斛計用人功輕於車運十倍有餘不費牛力又不廢田詔曰知欲造船運穀一冬即

成大省民力既不費牛又不廢田甚善非但一運自可
永以為式令別下統萬鎮出兵以供運穀鄉鎮可出百
兵為船工豈可專廢千人雖遣船匠猶須鄉指授未可
專主也諸有益國利民如此者續復以聞九年雍表曰
臣聞安不忘亂先聖之政也況綏服之外帶接邊城防
守不備無以禦敵者也臣鎮所綰河西爰在邊表常懼
不虞平地積穀實難守護兵人散居無所依恃脫有妖
姦必致狼狽雖欲自固無以得全今求造城儲穀置兵

備守鎮自建立更不煩官又於三時之隙不令廢農一
歲二歲不訖三歲必成立城之所必在水陸之次大小
高下量力取辦詔許之至十年三月城訖詔曰卿深思
遠慮憂勤盡忠知城已周訖邊境無不虞之憂千載有
永安之固朕甚嘉焉即名此城為刁公城以旌爾功也
興光二年詔雍還都拜特進將軍如故和平六年表曰
臣聞有國有家者莫不禮樂為先故樂記云禮所以制
外樂所以修內和氣中釋恭敬溫文是以安上治民莫

善於禮易俗移風莫善於樂且於一民一俗尚須宗而
用之況統御八方陶鈞六合者哉故帝堯修五禮以明
典章作咸池以諧萬類顯皇軌於云岱揚鴻化於介丘
令木石革心鳥獸率舞包天地之情達神明之德夫感
天動神莫近於禮樂故大樂與天地同和大禮與天地
同節和故百物阜生節故報天祭地禮行於郊則上下
和肅肅者禮之情和者樂之致樂至則無怨禮至則不
違揖讓而治天下者禮樂之謂歟唯聖人知禮樂之不

可以已故作樂以應天制禮以配地所以承天之道治
人之情故王者治定制禮功成作樂虞夏殷周易代而
起及周之末王政陵遲仲尼傷禮樂之崩亡痛文武之
將墜自衛返魯各得其中逮乎秦皇翦棄道術灰滅典
籍坑燼儒士盲天下之目絕象魏之章簫韶來儀不可
復矣賴大漢之興改正朔易服色協音樂制禮儀正聲
古禮粗欲周備至於孝章每以三代損益優劣殊軌歎
其薄德無以易民視聽博士曹褒覩斯詔也知上有制

作之意乃上疏求定諸儀以為漢禮終於休廢寢而不
行及魏晉之日修而不備伏惟陛下無為以恭己使賢
以御世方鳴和鸞以陟岱宗陪羣后以昇中岳而三禮
闕於唐辰象舞替於周日夫君舉必書古之典也柴望
之禮帝王盛事臣今以為有其時而無其禮有其德而
無其樂史闕封石之文工絕清頌之饗良由禮樂不興
王政有缺致也臣聞樂由禮所以象德禮由樂所以防
淫五帝殊時不相沿三王異世不相襲事與時並名與

功偕故也臣識昧儒先管窺不遠謂宜修禮正樂以光

大聖之治詔令公卿集議會高宗崩遂寢皇興中雍與
隴西王源賀及中書監高允等竝以耆年特見優禮錫
雍几杖劔履上殿月致珍羞焉雍性寬柔好尚文典手
不釋書明敏多智凡所為詩賦頌論并雜文百有餘篇
又汎施愛士恬靜寡欲篤信佛道著教誡二十餘篇以
訓導子孫太和八年冬卒年九十五賜命服一襲賜帛
五百疋贈儀同三司冀州刺史將軍如故諡曰簡

雍長子纂字奉宗中書侍郎早卒

纂弟遵字奉國襲爵

遵弟紹字奉世武騎侍郎汝陰王天賜涼州征西府司馬

紹弟獻字奉章祕書郎

獻弟融字奉業汝陰太守

融弟肅字奉誠中書博士遵少不拘小節長更修改太和
中例降為侯景明中除相州魏郡太守還為太尉詔

議參軍年七十志力不衰嘗經篤疾幾死見神明救免
言是福門之子當享長年延昌三年遷司農少卿尋拜
龍驤將軍洛州刺史遵招誘有方蕭衍新化太守杜性
新化令杜龍振平陽令杜臺定等率戶三千據地內附
熙平元年七月卒年七十六贈平東將軍兗州刺史謚
曰惠侯有子十三人

長子楷字景伯州舉秀才早卒

子冲字文朗在儒林傳

楷弟尚字景勝本州治中早卒

尚弟整字景智少有大度頗涉書史郡功曹太和十五年奉朝請高祖都洛親自臨選除司空法曹參軍高祖南討以廣陽王嘉鎮荊州整為嘉外兵參軍事尋轉太尉咸陽王禧外兵參軍景明中除給事中領本州中正尋除尚書左中兵郎中正始中蕭衍江州刺史王茂先來寇南境平南將軍楊大眼討之詔整持節為大眼軍司大破茂先斬衍輔國將軍王花等永平初以軍功除

員外散騎常侍仍除郎中延昌三年秋世宗親選百官
於朝堂拜右軍將軍仍除郎中尋轉驍騎將軍未幾丁
父憂相州刺史山陽王熙在鄴起兵將誅元乂等事敗
傳首京師熙之親故莫敢視整弟婦即熙姊遂收其屍
藏之後乃還熙所親又聞而致憾因以熙弟略南走蕭
衍誣整將叛送整與弟宜及子恭等幽繫之賴御史王
基前軍將檢事使魏子建理雪獲免後自征虜將軍出
除范陽太守時已兵亂整郡獲全去郡之後尋被陷沒

靈太后反政除安南將軍光祿大夫元略曾於整坐泣
謂黃門王誦尚書袁翻曰刁公叔歛我家鄉等宜知整
以母老河北喪亂時整族弟雙為西兗州刺史整遂攜
家依焉永安初拜金紫光祿大夫二年兼黃門元顥入
洛用為滄州刺史莊帝還朝坐免官後歸鄉里及莊帝
殺爾朱榮就除鎮東將軍行滄州事普泰初假征東大
將軍滄冀瀛三州刺史大都督將軍如前尋加車騎將
軍右光祿大夫逢本鄉賊亂奉母客於齊州加衛大將

軍天平四年卒於鄴贈司空公謚曰文獻整解音律輕財好施交結名勝聲酒自娛然貪而好色為議者所貶初雍與從弟寶惠俱入國

寶惠字道明太祖以為上客卒有六子

子連城為冀州開府掾刁氏世有榮祿而門風不甚修潔為時所鄙

雍族孫雙字子山高祖數晉齊郡太守數因晉亂居青州之樂安父道覆皇興初除平原太守至雙始還本鄉

雙少好學兼涉文史雅為中山王英所知賞拜西河太守正光初中山王熙之誅也熙弟略投命於雙雙護之周年時購略甚切略乃謂雙曰我兄弟屠滅已盡唯我一身漏刃相託卿雖厚恩久見容蔽但事留變生終恐難保脫萬一發覺我死分也無事相累卿若送吾出境便是再生之惠如其不爾輒欲自裁雙曰人生會有一死死所難遇耳今遭知己視死如歸願不以為慮略後苦求南轉雙乃遣從子昌送達江左靈太后返政知略

因雙獲免徵拜光祿大夫時略姊饒安公主刁宣妻也

頻訴靈太后乞徵略還朝廷乃以徐州所獲俘江革祖
暄二人易之以雙與略有舊乃令至境迎接略肅宗未
除西兗州刺史時賊盜蜂起州人張桃弓等招聚亡命
公行劫掠雙至境先遣使諭桃弓陳示禍福桃弓即隨
使歸罪雙捨而不問後有盜發之處令桃弓追捕咸悉
擒獲於是州境清肅莊帝初行濟州刺史以功封曲城
鄉男出帝初遷驃騎大將軍左光祿大夫興和三年卒

贈車騎大將軍儀同三司齊州刺史謚曰清穆

王慧龍自云太原晉陽人司馬德宗尚書僕射愉之孫散騎侍郎緝之子也幼聰慧愉以為諸孫之龍故名焉初劉裕微時愉不為禮及得志愉合家見誅慧龍年十四為沙門僧彬所匿百餘日將慧龍過江為津人所疑曰行意怱怱徬徨得非王氏諸子乎僧彬曰貧道從師有年止西岸今暫欲定省還期無遠此隨吾受業者何至如君言既濟遂西上江陵依叔祖忱故吏荊州前治

中習辟疆時刺史魏詠之卒辟疆與江陵令羅脩前別
駕劉期公土人王騰等謀舉兵推慧龍為盟主剋日襲
州城而劉裕聞詠之卒亦懼江陵有變遣其弟道規為
荊州衆遂不果羅脩將慧龍又與僧彬北詣襄陽司馬
德宗雍州刺史魯宗之資給慧龍送渡江遂自虎牢奔
于姚興其自言也如此泰常二年姚泓滅慧龍歸國太
宗引見與言慧龍請効力南討言終俯而流涕天子為
之動容謂曰朕方混一車書席卷吳會卿情計如此豈

不能相資以衆乎然亦未之用後拜洛城鎮將配兵三千人鎮金墉既拜十餘日太宗崩世祖初即位咸謂南人不宜委以師旅之任遂停前授初崔浩弟恬聞慧龍王氏子以女妻之浩既婚姻及見慧龍曰信王家兒也王氏世驢鼻江東謂之驢王慧龍鼻大浩曰真貴種矣數向諸公稱其美司徒長孫嵩聞之不悅言於世祖以其嘆服南人則有訕鄙國化之意世祖怒召浩責之浩免冠陳謝得釋及魯宗之子軌奔姚興後歸國云慧龍

是王愉家豎僧彬所通生也浩雖聞之以女之故成贊其族慧龍由是不調久之除樂安王範傅領并荆揚三州大中正慧龍抗表願得南垂自効崔浩固言之乃授南蠻校尉安南大將軍左長史及劉義隆荊州刺史謝晦起兵江陵引慧龍為援慧龍督司馬盧壽等一萬人拔其思陵戍進圍項城晦敗乃班師後劉義隆將王玄謨寇滑臺詔假慧龍楚兵將軍與安頡等同討之相持五十餘日諸將以賊盛莫敢先慧龍設奇兵大破之世

祖賜以劔馬錢帛授龍驤將軍賜爵長社侯拜滎陽太守仍領長史在任十年農戰並修大著聲績招攜邊遠歸附者萬餘家號為善政其後劉義隆將到彥之檀道濟等頻頓淮潁大相侵掠慧龍力戰屢摧其鋒彥之與友人蕭斌書曰魯軌頑鈍馬楚麤狂亡人之中唯王慧龍及韓延之可為深憚不意儒生懦夫乃令老子訝之劉義隆縱反間云慧龍自以功高而位不至欲引寇入邊因執安南大將軍司馬楚之以叛世祖聞曰此必不

然是齊人忌樂毅耳乃賜慧龍璽書曰義隆畏將軍如虎欲相中害朕自知之風塵之言想不足介意也劉義隆計既不行復遣刺客呂玄伯購慧龍首二百戶男絹一千疋玄伯偽為反間來求屏人有所論慧龍疑之使人探其懷有尺刀玄伯叩頭請死慧龍曰各為其主也吾不忍害此人左右皆言義隆賊心未已不殺玄伯無以制將來慧龍曰死生有命彼亦安能害我且吾方以仁義為干鹵又何憂乎刺客遂捨之時人服其寬恕慧

龍自以遭難流離常懷憂悴乃作祭伍子胥文以寄意
焉生一男一女遂絕房室布衣蔬食不參吉事舉動必
以禮太子少傅游雅言於朝曰慧龍古之遺孝也撰帝
王制度十八篇號曰國典真君元年拜使持節寧南將
軍虎牢鎮都副將未至鎮而卒臨沒謂功曹鄭曄曰吾
羈旅南人恩非舊結蒙聖朝殊特之慈得在疆場効命
誓願鞭屍吳市戮墳江陰不謂嬰此重疾有心莫遂非
唯仰愧國靈實亦俯慙后土修短命也夫復何言身歿

後乞葬河內州縣之東鄉依古墓而不墳足藏髮齒而
已庶魂而有知猶希結草之報時制南人入國者皆葬
桑乾曄等申遺意詔許之贈安南將軍荊州刺史謚穆
侯吏人及將士共於墓所起佛寺圖慧龍及僧彬象讚
之呂玄伯感全宥之恩留守墓側終身不去

子寶興襲爵

寶興少孤事母至孝尚書盧遐妻崔浩女也初寶興母
及遐妻俱孕浩謂曰汝等將來所生皆我之自出可指

腹為親及婚浩為撰儀躬自監視謂諸客曰此家禮事
宜盡其美及浩被誅盧遐後妻寶興從母也緣坐沒官
寶興亦逃避未幾得出盧遐妻時官賜度河鎮高車滑
骨寶興盡賣貨產自出塞贖之以歸州辟治中從事別
駕舉秀才皆不就閉門不交人事襲爵長社侯龍驤將
軍卒子瓊襲爵

瓊字世珍高祖賜名焉太和九年為典寺令十六年降
侯為伯高祖納其長女為嬪拜前軍將軍并州大中正

正始中為光州刺史有受納之響為中尉王顯所劾終
得雪免神龜中除左將軍兗州刺史去州歸京多年沉
滯所居在司空劉騰宅西騰雖勢傾朝野初不候之騰
既權重吞并隣宅增廣舊居唯瓊終不肯與以此久見
抑屈瓊女適范陽盧道亮不聽歸其夫家及女卒哀慟
無已瓊仍葬之別所冢不即塞常於壙內哭泣久之乃
掩當時深恠疑其穢行加以聾疾每見道俗乞丐無已
造次見之令人笑愕道逢太保廣平王懷據鞍抗禮自

言馬瘦懷即以誕馬并乘具與之嘗詣尚書令李宗騎

馬至其黃閤見宗子世哲直問繼伯在否宗趨出瓊乃

下崇儉而好以紙帖衣領瓊哂而掣去之宗小子青朧

嘗盛服

闕

寵勢亦不足恨領軍元又使奴遺瓊馬并留

奴王誦聞之笑曰東海之風於茲墜矣孝昌三年除鎮

東將軍金紫光祿大夫中書令時瓊子遵業為黃門郎

故有此授卒年七十四贈征北將軍中書監并州刺史

自慧龍入國三世一身至瓊始有四子

長子遵業風儀清秀涉歷經史位著作佐郎與司徒左
長史崔鴻同撰起居注遷右軍將軍兼散騎常侍慰勞
蠕蠕乃詣代京採拾遺文以補起居所闕與崔光安豐
王延明等參定服章及光為肅宗講孝經遵業預講延
明錄義並應詔作釋奠侍宴詩時人語曰英英濟濟王
家兄弟轉司徒左長史黃門郎監典儀注遵業有譽當
時與中書令陳郡袁翻尚書瑯琊王誦並領黃門郎號
曰三哲時政歸門下世謂侍中黃門為小宰相而遵業

從容恬素若處丘園嘗著穿角履好事者多毀新履以
學之以胡太后臨朝天下方亂謀避地自求徐州太后
曰王誦罷幽州始作黃門卿何乃欲徐州更待一二年
當有好處分遵業兄弟並交遊時俊乃為當時所美及
爾朱榮入洛兄弟在父喪中以於莊帝有從姨兄弟之
親相率奉迎俱見害河陰議者惜其人才而譏其躁競
贈并州刺史著三晉記十卷

遵業子松年尚書庫部郎

韓延之字顯宗南陽堵陽人魏司徒暨之後也司馬德宗平西府錄事參軍劉裕率伐司馬休之未至江陵密使與延之書招之延之報曰聞親率戎馬遠履西畿闔境士庶莫不怪駭何者莫知師出之名故也司馬平西體國忠貞款愛待物當於古人中求耳劉裕足下海內之人誰不見足下此心而復欲欺誑國士天地所不容在彼不在此矣今伐人之君啗人以利真可謂處懷期物自有由來者矣以平西之至德寧無授命之臣乎假

今天長喪亂九流渾濁當與臧洪遊於地下不復多言
裕得書歎息以示諸佐曰事人當應如此劉裕父名翹
字顯宗於是延之字顯宗名子為翹蓋示不臣劉氏也
後奔姚興泰常二年與司馬文思來入國以延之為虎
牢鎮將爵魯陽侯初延之曾來往栢谷塢省魯宗之墓
有終焉之志因謂子孫云河洛三代所都必有治於此
者我死不勞向北代葬也即可就此及卒子從其言遂
葬於宗之墓次延之死後五十餘年而高祖徙都其孫

即居於墓北栢谷塢延之前妻羅氏生子措措隨父入國又以淮南王女妻延之生道仁措推道仁為嫡襲父爵位至殿中尚書進爵西平公

袁式字季祖陳郡陽夏人漢司徒滂之後父淵司馬昌明侍中式在南歷武陵王遵諮議參軍與司馬文思等歸姚興泰常二年歸國為上客賜爵陽夏子與司徒崔浩一面便盡國士之交是時朝儀典章悉出於浩浩以式博於古事每所草創恒顧訪之性長者雖羈旅颺泊

而清貧守度不失士節時人甚敬重之皆呼曰袁諮議
延和三年衛大將軍樂安王範為雍州刺史詔式與中
書侍郎高允俱為從事郎中辭而獲免式沉靖樂道周
覽書傳至於詁訓倉雅偏所留懷作字釋未就以天安
二年卒贈豫州刺史謚肅侯

子濟襲位魏郡太守政有清稱加寧遠將軍子姪遂居
潁川之陽夏

史臣曰刁雍才識恢遠著聲立事禮遇優隆世有人爵

堂構之義也王慧龍援難自歸頗歷夷險撫人督衆見
憚嚴敵世珍實有令子克播家聲韓延之報書劉裕國
體在焉袁式贊禮儀崔浩時稱長者一時有稱信為美
哉

魏書卷三十八

魏書卷三十八考證

刁雍傳山陽王熙在鄴起兵。○本書南安王楨子英世宗時改封中山王英子熙延昌二年襲爵尋授相州刺史即起兵上表此處作山陽王亦互異

魏書卷三十八考證

欽定四庫全書薈要卷四千四百五十八

史部

魏書卷三十九

齊

魏

收

撰

列傳第二十七

李寶

李寶字懷素小字衍孫隴西狄道人私署涼王嵩之孫也父翻字士舉小字武彊私署驍騎將軍祁連酒泉晉昌三郡太守寶沉雅有度量驍勇善撫接伯父歆為沮

渠蒙遜所滅寶徙於姑臧歲餘隨舅唐契北奔伊吾臣
於蠕蠕其遺民歸附者稍至二千寶傾身禮接甚得其
心衆皆樂為用每希報雪屬世祖遣將討沮渠無諱於
敦煌無諱捐城遁走寶自伊吾南歸敦煌遂修繕城府
規復先業遣弟懷達奉表歸誠世祖嘉其忠歎拜懷達
散騎常侍敦煌太守別遣使授寶使持節侍中都督西
垂諸軍事鎮西大將軍開府儀同三司領護西戎校尉
沙州牧敦煌公仍鎮敦煌四品以下聽承制假授真君

五年因入朝遂留京師拜外都大官轉鎮南將軍并州
刺史還除內都大官高宗初代司馬文思鎮懷荒改授
鎮北將軍太安五年薨年五十三詔賜命服一襲贈以
本官謚曰宣有六子承茂輔佐公業沖公業早卒沖別
有傳

承字伯業少有策畧初寶欲謀歸款民僚多有異議承
時年十三勸寶速定大計於是遂決仍令承隨表入質
世祖深相器異禮遇甚優賜爵姑藏侯後遭父憂居喪

以孝聞承應傳先封以自有爵乃讓弟茂時論多之承
方裕有鑒裁為時所重高宗末以姑臧侯出為龍驤將
軍滎陽太守為政嚴明甚著聲稱延興五年卒時年四
十五贈使持節本將軍雍州刺史謚曰穆

長子韶字元伯學涉有器量與弟彥虔並為高祖賜
名焉韶又為季父沖所知重延興中補中書學生襲爵
姑臧侯除儀曹令時修改車服及羽儀制度皆令韶典
焉遷給事黃門侍郎後例降侯為伯兼大鴻臚卿黃門

如故高祖將創遷都之計詔引侍臣訪以古事韶對洛陽九鼎舊所七百攸基地則土中實均朝貢惟王建國莫尚於此高祖稱善遷太子右詹事尋罷左右仍為詹事秦州大中正出為安東將軍兗州刺史高祖自鄴還洛韶朝於路言及庶人恟事高祖曰卿若不出東宮或未至此世宗初徵拜侍中領七兵尚書尋除撫軍將軍并州刺史以從弟伯尚同元禧之逆在州禁止徵還京師雖不知謀猶坐功親免除官爵久之起兼將作大匠

勅叅定朝儀律令呂苟兒反於秦州除撫軍將軍西道
都督行秦州事與右衛將軍元麗率衆討之事平即真
璽書勞勉復其先爵時隴右新經師旅之後百姓多不
安業韶善撫納甚得夷夏之心徵還行定州事尋轉相
州刺史將軍如故肅宗初入為殿中尚書行雍州事後
除中軍大將軍吏部尚書加散騎常侍韶在選曹不能
平心守正通容而已議者貶之出為冀州刺史清簡愛
民甚收名譽政績之美聲冠當時肅宗嘉之就加散騎

常侍遷車騎大將軍賜劍佩貂蟬各一具驂騮馬一匹
并衣服寢具韶以年及懸車抗表遜位優旨不許轉定
州刺史常侍如故及赴中山冀州父老皆送出西境相
聚而泣二州境既連接百姓素聞風德州內大治正光
五年四月卒於官年七十二詔贈帛七百疋贈侍中持
節散騎常侍車騎大將軍司空公雍州刺史謚曰文恭
既葬之後有冀州兵千餘人戍於荊州還經韶墓相率
培冢數日方歸其遺愛如此初韶克定秦隴永安中追

封安城縣開國伯邑四百戶

長子璵字道璠襲武定中驃騎大將軍東徐州刺史

璵弟瑾字道瑜美容貌頗有才學特為韶所鍾愛清河
王懌知賞之懌為司徒辟叅軍轉著作佐郎加龍驤將
軍稍遷通直散騎侍郎與給事黃門侍郎王遵業尚書
郎盧觀典領儀注臨淮王彧謂瑾等曰卿等三儁共掌
帝儀可謂舅甥之國士盧即瑾之外兄也肅宗崩上謚
策文瑾所制也莊帝初於河陰遇害年四十九贈冠軍

將軍齊州刺史

長子產之字孫僑容貌短陋而撫訓諸弟愛友篤至年四十九亡

產之弟蒨之武定末司空主簿

瑾弟瓚字道璋少有風尚辟司徒叅軍事神龜中卒贈漢陽太守

子修年大將軍開府士曹叅軍早亡

韶弟彥字次仲頗有學業高祖初舉司州秀才除中書

博士轉諫議大夫後因考課降為元士尋行主客曹事

徙郊廟下大夫時朝儀典章咸未周備彥留心考定號

為稱職高祖南伐彥以叢爾江閩不足親勞鑿駕頻有

表諫雖不從納然亦嘉其至誠及六軍次於淮南徵為

廣陵王羽長史加恢武將軍西翼副將軍還除冀州趙

郡王幹長史轉青州廣陵王羽長史帶齊郡太守徵為

龍驤將軍司徒右長史轉左長史秦州太中正出行揚

州事尋徵拜河南尹還至汝陰復勅行徐州事轉平北

將軍平州刺史還平東將軍徐州刺史延昌二年夏大霖雨川瀆皆溢彥相水陸形勢隨便疏通得無淹漬之害朝廷嘉之頻詔勞勉入為河南尹遷金紫光祿大夫光祿勳卿轉度支尚書出為撫軍將軍秦州刺史是時破落汗拔陵等反於北鎮二夏幽涼所在蜂起而彥刑政過猛為下所怨城民薛珍劉慶杜超等因四方離叛遂潛結逆謀正光五年六月突入州門擒彥於內齋囚於西府推其黨莫折大提為帥遂害彥永安中追贈侍

中驃騎大將軍司徒公雍州刺史謚曰孝貞

子變字德諧少有風望解褐司徒叅軍著作佐郎司徒祭酒轉主簿卒贈輔國將軍太常少卿

變弟德廣終於中散大夫

德廣弟德顯太尉行叅軍稍遷散騎侍郎卒贈征虜將軍東秦州刺史

德顯弟德明祕書郎

彥弟虔字叔恭太和初為中書學生遷祕書中散轉冀

州驃騎府長史太子中舍人世宗初遷太尉從事中郎
出為清河太守屬京兆王愉反虔棄郡奔關世宗聞虔
至謂左右曰李虔在冀州日久恩信著物今拔難而來
衆情自解矣乃授虔別領軍前慰勞事事平轉長樂太
守延昌初冀州大衆賊起令虔以本官為別將與都督
元遙討平之遷後將軍燕州刺史還為光祿大夫加平
西將軍兼大司農卿出為散騎常侍安東將軍兗州刺
史追論平冀州之功賜爵高平男還京除河南邑中正

遷鎮軍將軍金紫光祿大夫孝莊初授特進車騎大將軍儀同三司加散騎常侍又進號驃騎大將軍開府儀同三司永安三年冬薨年七十四贈侍中都督冀定瀛三州諸軍事驃騎大將軍太尉公冀州刺史男如故謚曰宣景

長子暖字仁明解褐司空行叅軍稍遷尚書左外兵郎孝莊初於河陰遇害年四十贈安東將軍度支尚書青州刺史

子褒武定中太師法曹叅軍

暖弟昞字仁曜起家高陽王雍常侍員外散騎侍郎太尉錄事叅軍孝莊初與兄暖同時遇害年四十八贈散騎常侍左將軍兗州刺史

子為武定中司空長流叅軍

昞弟昭字仁照卒於散騎侍郎贈征虜將軍涼州刺史子士操武定中竝儀同開府叅軍事

昭弟曉字仁畧武定末太尉諮議叅軍

虔弟璉字延賓歷步兵校尉東郡太守司農少卿卒贈
龍驤將軍豫州刺史

長子詠字義興有幹局起家太學博士領殿中侍御史
稍遷東郡太守莊帝初遷安東將軍濟州刺史轉廣州
刺史加散騎常侍前廢帝時與第三弟通直散騎常侍
義真第七弟中書侍郎太常少卿義邕同時為爾朱仲
遠所害義邕莊帝居蕃之日以外親甚見親昵及有天
下特蒙信任爾朱榮之誅義邕與其事由是竝及於禍

出帝初贈詠侍中驍騎將軍吏部尚書冀州刺史義真
贈前將軍齊州刺史義邕贈安東將軍青州刺史

詠次弟義慎司空屬第四弟義遠國子博士莊帝初竝
於河陰遇害義慎贈散騎常侍征東將軍雍州刺史

承弟茂字仲宗高宗末襲父爵鎮西將軍敦煌公高祖
初除長安鎮都將轉西兗州刺史將軍如故入為光祿
大夫例降為侯茂性謙慎以弟冲寵盛懼於盈遂託以
老疾同請遜位高祖不奪其志聽食大夫祿還私第因

居定州之中山自是優遊早舍不入京師景明三年卒時年七十一諡曰恭侯

子靜字紹安襲解褐太尉叅軍事定州別駕東平原太守神龜三年卒年五十五

子遐字智遠有几案才起家司空行叅軍襲爵稍遷右將軍尚書駕部郎中出為河內太守爾朱榮稱兵向洛次其郡境莊帝潛濟河北相會遐既聞榮推奉莊帝遂開門謁候仍從駕南渡及河陰為亂兵所害時年四十

二事寧追贈散騎常侍車騎大將軍尚書右僕射秦州刺史以候駕之功封盧鄉縣開國伯邑三百戶

子孝儒襲齊受禪爵例降

靜弟字仲安恭順篤厚起家鎮北府功曹叅軍定州別駕汝陽汝南中山三郡太守孝莊初以外親超授撫軍將軍金紫光祿大夫出除鎮東將軍滄州刺史加散騎常侍普泰元年卒年六十二有五子

長子惠昭太傅開府城局叅軍

惠昭弟惠謐武定中齊州別駕

孚弟敬安奉朝請早亡

敬安弟季安粗涉書史解褐彭城王行叅軍稍遷寧朔將軍步兵校尉出為徐州北海王顥撫軍府長史正光末顥為關西都督復引為長史委以戎政尋加驍騎將軍孝昌三年卒於軍時年五十三贈征虜將軍涼州刺史

子處默少清惠起家青州彭城王府主簿稍遷通直散

騎常侍安東將軍光祿大夫撫軍將軍廣州開府長史
天平初卒年三十九

茂弟輔字督真亦有人望解褐中書博士遷司徒議曹
掾太和初高祖為咸陽王禧納其女為妃除鎮遠將軍
潁川太守帶長社戍輔綏懷招集甚得邊和六年卒於
郡年四十七贈征虜將軍秦州刺史襄武侯謚曰惠
長子伯尚少有重名弱冠除祕書郎高祖每云此李氏
之千里駒稍遷通直散騎侍郎勅撰太和起居注尋遷

祕書丞世宗初兼給事黃門侍郎景明二年坐與咸陽王禧謀反誅時年二十九

伯尚弟仲尚儀貌甚美少以文學知名二十著前漢功臣序讚及季父司空沖誅時兼侍中高聰尚書邢巒見而歎曰後生可畏非虛言也起家京兆王愉行叅軍景明中坐兄事賜死年二十五

仲尚弟季凱沉敏有識量坐兄事同母弟俱徙邊久之會赦免遂寓居於晉陽沉廢積年孝昌中解褐太尉叅

軍事加威遠將軍尋除并州安北府長史肅宗崩爾朱
榮陰圖義舉季凱豫謀莊帝踐阼徵拜給事黃門侍郎
封博平縣開國侯邑七百戶尋加散騎常侍東平將軍
轉祕書監進號中軍將軍普泰元年七月爾朱世隆以
榮之死謂季凱通知於是見害年五十五出帝初追贈
侍中驃騎將軍吏部尚書定州刺史

子統字基伯襲武定末太尉刑獄叅軍齊受禪爵例降
季凱弟延慶孝昌中解褐定州鎮北城局叅軍稍遷奉

車都尉陳留太守遷鎮東將軍金紫光祿大夫永熙二年卒年五十二贈本將軍雍州刺史

子惠矩武定中儀同開府叅軍事

延慶弟延度武定中衛將軍安德太守

輔弟佐字季翼有文武才幹高祖初兼散騎常侍銜命使高麗以奉使稱旨還拜常山太守賜爵真定子遷冠軍將軍懷州刺史賜爵山陽侯尋加安南將軍河內公轉安東將軍相州刺史所在有稱績車駕南討拜安南

將軍副大司馬咸陽王禧為殿中將軍尋被勅與征南將軍城陽王鸞安南將軍盧淵等軍攻輔陽各不相節度諸軍皆坐甲城下欲以不戰降賊佐獨勒所部晨夜攻擊屬蕭鸞遣其太子右衛率垣歷生率眾來援咸以勢弱不敵規欲班師佐乃簡騎二千逆賊為賊所敗坐徙瀛州為民車駕征宛鄧復起佐假平遠將軍統軍蕭鸞新野太守劉忌憑城固守佐率所領攻拔之以功封涇陽縣開國子邑三百戶河北既平廣陽王嘉為荊州

刺史仍以佐為嘉鎮南府長史加輔國將軍別鎮新野及大軍凱旋高祖執佐手曰河北洛陽南門卿既為朕平之亦當為朕善守高祖崩遺勅以佐行荊州事仍本將軍佐在州威信大行邊民悅附前後歸之者二萬許家尋正刺史世宗初徵兼都官尚書景明二年卒年七十一贈征虜將軍秦州刺史謚曰莊子遵襲

遵與雋有父風歷相州治中轉別駕冀州征北府長史司空司馬卒贈龍驤將軍洛州刺史孝莊初以外戚超

贈車騎大將軍儀同三司定州刺史

子果襲司空諮議叅軍武定中坐通西賊伏誅

遵弟東字休賢郡辟功曹以父憂去職遂終身不食酒
肉因屏居鄉里肅宗初司空任城王澄嘉其操尚以為
叅軍事尋轉司徒外兵叅軍歷任城濟北二郡大守孝
莊初遷鎮遠將軍濟州刺史卒贈安北將軍殿中尚書
相州刺史

子經司徒諮議叅軍行豫州事興和初坐妖言賜死

東弟神儁小名提少以才學知名為太常劉芳所賞釋
褐奉朝請轉司徒祭酒從事中郎頃之拜驍騎將軍中
書侍郎太常少卿出為前將軍荊州刺史時四方多事
所在連兵蕭衍遣將曹敬宗來寇攻圍積時又引水灌
城城不沒者數版神儁循撫兵民戮力固守詔遣都督
崔暹別將王羆裴衍等赴援敬宗退走時寇賊之後城
外多有露骸神儁教令收葬之徵拜大司農卿肅宗末
除鎮軍將軍行相州事於時葛榮南逼神儁憂懼乃故

墜馬傷脚仍傳汲郡有詔追還莊帝纂統以神僞外戚
之望拜散騎常侍殿中尚書追論固守荊州之功封千
乘縣開國侯邑一千戶轉中書監吏部尚書神僞意尚
風流情在推引人物而不能守正奉公無多聲譽有鉅
鹿人李炎上書言神僞之失天柱將軍爾朱榮曾補人
為曲陽縣令神僞以階縣不用榮聞大怒謂神僞自樹
親黨排抑勲人神僞懼啓求解官乃除衛將軍左光祿
大夫尋屬爾朱兆入京乘輿幽執神僞遂逃竄民間出

帝初始來歸闕拜散騎常侍驃騎大將軍左光祿大夫
儀同三司孝靜初行并州事尋除驃騎大將軍肆州刺
史入為侍中興和二年薨年六十四贈都督雍秦涇三
州諸軍事驃騎大將軍尚書左僕射司徒公雍州刺史
侍中開國公如故神儁風韻秀舉博學多聞朝廷舊章
及人倫氏族多所諳記篤好文雅老而不輟凡所交遊
皆一時名士汲引後生為其光價四方才子咸宗附之
而性通率不持檢度至於少年之徒皆與褻狎不能清

正方重識者以此為譏神儁喪二妻又欲娶鄭嚴祖妹
神儁之從甥也盧元明亦將為婚遂至紛競二家閱於
嚴祖之門鄭卒歸元明神儁惆悵不已時人謂神儁鳳
德之衰神儁無子從弟延度以第三子容兒後之

韶從弟元珍小名大墨起家奉朝請太尉錄事叅軍卒
於步兵校尉

元珍弟仲遵有業尚彭城王勰為定州請為開府叅軍
累轉員外散騎常侍遊擊將軍太中大夫出為京兆內

史大將軍京兆王繼西伐請而諮議叅軍尋除左將軍
營州刺史時四方州鎮謀逆叛亂相續營州城內咸有
異心仲遵單車赴州既至與大使盧同以恩信懷誘率
皆怡悅後肅宗又詔盧同為行臺北出慰勞同疑彼人
情難信聚兵將往城民劉安定等先有異志謂欲圖已
還相恐動遂執仲遵二子清石阿罕尋亦見殺惟兄子
徽仁得免

韶從叔思穆字叔仁父抗自涼州渡江左仕劉駿歷晉

壽安東東萊三郡太守思穆有度量善談論工草隸為當時所稱太和十七年攜家累自漢中歸國除步兵校尉遭母憂解任起為都水使者及車駕南伐以本官兼直閭將軍從平南陽以功賜爵為伯尋除司徒司馬彭城王勰為定州請為司馬帶鉅鹿太守勰徙鎮揚州仍請為司馬府解除征虜將軍太中大夫出為京兆內史在郡八年頗有政績徵拜光祿大夫肅宗初除平北將軍中山太守未拜遷安北將軍營州刺史卒於位時年

六十一贈安西將軍華州刺史永安中子獎為莊帝所
親待復超贈思穆衛將軍中書監左光祿大夫謚曰宣
惠有子十四人

嫡子斌襲官至散騎侍郎早卒

斌兄獎武定末司徒左長史李氏自初入魏人位兼舉
因冲寵遇遂為當世盛門而仁義吉凶情禮淺薄朞功
之服殆無慘容相視窘乏不加拯濟識者以此貶之
史臣曰李寶家難流離晚獲歸正大享名器世業不殞

諸子承基俱有位望韶清身履度聲績洽美矣神儁才
尚風流殆民望也貞粹之地君子或未許焉

魏書卷三十九

魏書卷三十九考證

李寶傳隨舅唐契北奔伊吾○唐監本誤廣各本同考
本書唐和傳和與兄契攜外甥李寶避難伊吾北史
亦云攜其甥武昭王孫寶臣於蠕蠕乃諸本俱作廣
契傳寫之謬也今改正

年四十○

臣人龍

按暖弟昞傳云孝莊初與兄暖同時

遇害年四十八暖既昞兄矣反年四十即二者必有

一誤

請而諮議叅軍○而當作為

魏書卷三十九考證